

## Tito

### *Pablo Titore gojabeopu*

<sup>1</sup> Yuhu Pablo mure Titore gojaa. Goamu pohro majagu, Jesucristo yare igu buhedore igu apidigu ahraa. Goamu igu beyenira Jesure era umupeoburire, oari buherire era masiburire Jesu buhedoregu yure apimi. Iri buheri Goamu igu doreiro dopa ta mari iiburire werea. <sup>2</sup> Eropigu aripehrerinari Goamu yara umarogue era oaro ariniguiboro sare buhea erare. Goamu ne gayari marigu i yebare igu ihacunuguboro core "Yu pohrogue eropa oaro ariniguicaracoma," ari apipu marire. <sup>3</sup> Eropigu igu queoranu aricu igu eropa ari apirare masidoredigu arimi masare. Eropa ta masidoregu yure erare weredoremi igu marire taugu. <sup>4</sup> Mure Jesu yare buhebu. Yu eropa buhecã peegu, Jesure umupeonugabu mahu yu umupeoro dopa. Eropigu mahu yu buhedigu arigu diaye ta yu magu iro dopa arigu ta iiaa. Mure ire gojabeogu iiaa. Eropigu Goamu mari Pagu, Jesucristo marire taugu itamuri mera mure oadorea. Igu itamuri mera oaro arique mahu.

*Creta waicuri nuguro majarare Tito igu wereburire werepu Pablo*

<sup>5</sup> Creta waicuri nuguro yu mure apicu Jesu yara era buheboro duhyanibu irisubure. Eropigu era iiburire werebure apibu yuhu mure.

Eropigu macari nũcu majarã Jesu yarã oparã árĩmorãre beyedoregu apibu mure. <sup>6-8</sup> Erã oparã Goãmu pohro majarã ãhrima. Eropigu erãre beyegu òarãre beyeque gajiropa iibirãre. Eropigu yujugo ta marapocurã árĩrãre beyeque. Eropigu “Bu árĩgu ãhraa yũhũ,” arĩ pepirãre beyeque. Eropigu mata guabirãre, merebirãre, masa mera gamequeãbirãre, niyerure gamebirãre beyeque. Eropa beyegu erã ya wihire ñajarãre òaro ìhadiburãre, òaripure sũarãre, pee masirãre, òaripure iiniguirãre, ñeri marirãre, erã ùaribejarire iibirãre, teboru mariro mohmerãre, òarire iiniguirãre beyeque. Eropirã mua beyerã porãre òpa árĩro gahmea. Jesure umupeorã, òarire iiniguirã, árĩpehrerãre òaro yũhrirã árĩro gahmea oparã porãre. <sup>9-10</sup> Eropirã òari buherire queoro mari buhediro dopa ta ne duhubirã árĩporo oparã mu beyenirã. Eropirã òari buherire wererã árĩrãcoma. Eropa iirã òari buherire gamebirãre buherã erã ya guyarĩ árĩcũ masicũ iirãcoma erã. Eropigu òaro beyeque Jesu yarã weca oparã árĩpehrerãre.

Bajarã erã oparãre tarinũgarã, òaro pepi wereniguibirã, guyarã ãhrima dohpaguere. Eropa iirã yujurãyeri Moise dorerire iidorerã tamera ñetariaro iirã iima. Erã buheri iri diaye árĩbircũ erãre masicũ iiro gahmea. <sup>11</sup> Erã Moise dorerire iidorerãpũ guyarire buherã niyerure wajatadiarã buhema. Eropa buherã yujuyeri wiri majarãre árĩpehrerãre Goãmu yapure cóãcũ iirã iicoma erã. Erã eropa iicũ erãre iidorebircãro gahmea.

<sup>12</sup> Iribojegue weredigu Creta majagu

árĩqueregu ta õpa arĩ werepũ: “Creta nuęuro majarã eropa guyaniguirã waĩcuma. Ñerire iirã diayea iro dopa iirã aħrima. Eropirã pagari barã árĩrã ne mohmediabeama,” arĩpũ ĩgu ĩgu ya nuęuro majarãre. <sup>13</sup> ĩgu eropa arĩra diaye ta aħraa. Erã eropa árĩcũ ĩagu erãre turaro wereque Jesu ya buheripũre erã õaro pee masiboro dopa. <sup>14</sup> Eropigu “Judio masa iribojegue majarã erã arĩ bocarare peebiricãque,” arĩ wereque erãre. Jesu yare gamebirã erã doreri sãre Creta majarã erã peenurubiriborore wereque erãre.

<sup>15</sup> Õpa aħraa. Dipuwaja marirã õari dihtare pepima. Ñerire iiniguirãpũ ñeri dihtare pepima. Erã pepiripũ ñetaria. Eropirã õaripũre beyemasibeama. <sup>16</sup> Erã “Goãmũre masia guã,” arĩquererã ta ñerire iima. Eropa iinirã erã árĩcũ ĩarã Goãmũre masibirã erã árĩcũ masia mari. Eropirã erã ñetariarã, Goãmũ yare tarinugarã aħrima. Eropirã õarire iimasibeama.

## 2

### *Õari buherire weredorepũ Pablo Titore*

<sup>1</sup> Mũpũ buhegu õari buheri arĩdiro dopa ta õaro buheque. <sup>2</sup> Mũrãpũre õpa wereque: “Mũa guhyadiarã, masa erã umupeorã, pee masirã, ‘Goãmũ diaye iigu aħrimi,’ arĩ umupeorã, õari buherire õaro iirã, Jesure masa sãre mahirã, ñero tariquererã ta yujuro bojerã árĩque,” arĩ wereque erãre. <sup>3</sup> Mũrã nome sãre eropa ta arĩ wereque: “Guhyadiarã nome, ñeri quere werewũbirã nome, merebirã nome árĩque,” arĩ

wereque erã nome sãre. Eropirã erã nome õarire gajirãre buheporo. <sup>4</sup> Eropa iirã õpa arĩ buheporo murã nome nómeñaripure: “Mũa marapũ sũmarãre mũa porã sãre mahique,” arĩ buheporo. <sup>5</sup> “Eropirã mũa pee masirã nome, gajirã ũa mera ñero iibirã nome, mũa ya wihi majare õaro ñhadiburã nome, õaro iirã nome, mũa marapũ sũmarãre õaro yũhrirã nome árĩque,” arĩ buheporo murã nome nómeñaripure. Erã eropiicũ ñarã gajirãpũ “Goãmũ yare umupeorã ñero iirã ãhrima,” arĩmasibeama mũare.

<sup>6</sup> Eropigũ mamarã sãre õpa wereque: Pee masirã árĩporo erã. <sup>7</sup> Eropigũ mũpũ õari dihtare iiniguicãque mũre erã ñhacũburire. Buhegũ ne gũyaro mariro buheque. Eropa buhegũ gũhyadiaro mera buheque mũhũ. <sup>8</sup> Eropa buhegũ õaro pee masiri mera buheque ne gajirã mũre erã weresãmasibiriburire. Mũ eropa buhecũ ñarã marire ñhaturirã árĩquererã ta marire bu gohra ta werewũamasibeama. Marire eropa werewũamaacãrã gũhyasĩuro warãcoma erã.

<sup>9</sup> Eropigũ pohro majarãre õpa doreque: Erã oparãre õaro yũhrirã árĩporo. Eropirã erã oparãre õaro mucubiricũ iiporo. Eropa dihta iiporo. Eropirã erã oparãre pũriro mera yũhribiricãporo. <sup>10</sup> Eropirã erã oparã yare yajabiricãporo. Eropirã õarã erã oparã dorerire õaro iiniguicãrã árĩporo. Erã eropa õaro yũhrirã árĩcũ ñarã Goãmũ marire taugũ ñgũ buherire pee sũarãcoma gajirã.

<sup>11</sup> Masare ñgũ mahirire Goãmũ mari masare

masicũ iituhajami. Mari masare eropa mahigu árĩpehrerã peamegue wabonirãre Goãmũ turaro taudiami. <sup>12-13</sup> Masare eropa mahigu Goãmũ marire õpa doremi: Ñeri iirire, ñerire uaribejarire duhucãdoremi marire. Goãmũ turagu, Jesucristo marire taugu ïgu õarire mari ïaburinure, ïgu õaro mera dujariburinure mari corerã iiaa. Eropigu mari corerinũ mari corerisubu, mari pee masirã, õarire iinigu-irã, Goãmure umupeoniguirã marire árĩdoremi Goãmũ. <sup>14</sup> ïgu Jesucristo mari ya árĩburire ta sĩridi árĩmi. Árĩpehrerã mari ñeri iirire duhucũ iibu, marire ïgu yarã wacũ iibu sĩridi árĩmi. Mari ñerire ïgu eropa cóãcũ mari ñerire iira dipuwaja marirã árĩrãca. Eropirã turaro õarire iidiarã árĩrãca.

<sup>15</sup> Ire árĩpehrerire iri nũguro majarãre Jesu yarãre buheque mũhũ. Erã opu árĩgu ta iiaa mũhũ. Eropigu erãre wereque. Eropigu erã ñerire iicũ ïagu wereque erãre. Eropirã árĩpehrerã gajirã mũre cóãdiabiricãporo.

### 3

#### *Jesu yarã erã iiburire werenemopũ Pablo*

<sup>1</sup> Õpa guñacũ iique ero majarã Jesu yarãre: Erã oparãre õaro yũhrirã árĩporo. Eropirã árĩpehrerire õari dihtare iirã árĩporo. <sup>2</sup> Eropirã gajirãre ne quere goroweobiricãporo. Game dũyasobiricãporo. Eropirã masa õarã, árĩpehrerãre umupeorã árĩporo.

<sup>3</sup> Iribojegue mari sã pee masibirã, tarinũgarã, gũyarire peenũrãrã, ñerire iisuarã, ñerire

uaribeja duhumasibirã, umuri nucu ñerire iiniguirã, gajirãre erã gajinore opacũ ñhaturirã árĩmũriribũ mari sã. Eropirã marire gajirã ñhaturimũrima. Eropirã mari sã erãre ñhaturimũriribũ. <sup>4-5</sup> Eropa árĩnirã árĩquerecũ ta Goãmũ marire peamegue wabonirãre taumi. Eropa taugũ ñgũ ñgũ õagũ árĩrĩre, masare ñgũ mahirire marire ñhmudi árĩmi. Õaro mari iira mera taubirimi marire. Marire mojomoro ñagũ mari ñeri iirare coegũ Espĩritu Santo mera marire taumi. Eropa iigũ marire ñgũ porã wacũ iimi. Eropigũ Espĩritu Santopũ mari õarã árĩburire marire gohrotomi. <sup>6</sup> Jesucristo mari ñeri iira dipuwaja ñgũ sĩri, masa mũriara mera Goãmũ ñgũ Espĩritu Santore omi marire wũaro ñgũ turarire mari opaboro dopa. <sup>7</sup> Marire mahigũ, marire õaro iidiami. Eropigũ ñgũ, ñgũ Espĩritu Santore omi, ñeri iira dipuwaja marirã mari árĩborore, umarogue mari eropa õaro árĩniguicãborore. Mari eropa árĩniguiburire masirã irire mucubiri corerã iiaa mari.

<sup>8</sup> Iri yũ werera diaye ta ãhraa. Eropigũ irire yũ werediro dopa ta masare buhegũ iri dorerire ipehodoreque mũhũ. Eropigũ Goãmũre umu-peorãre irire buheque õarire erã õaro iiboro dopa. I yũ arĩ buhera õari buheri ãhraa. Eropirã masa i buherire erã peenũrucũ õaro itamuri árĩroca erãre. <sup>9</sup> Gajirã wereniguiripũ duhpiburi árĩbeaa. Erã masibiriquererã ta erã arĩ dũyasoma. Erã ñecũ sũmarã arĩ bocarare game dũyasoma. Moise dorerire arĩ dũyasoma. Erã eropa arĩ dũyasori iri árĩpehreri duhpiburi árĩbeaa. Eropigũ irire peenũrbiricãque. Mũ sã

dɥayasobiricãque.

<sup>10</sup> Mɥa mera majagu eropa game dɥayasogu mɥa basi game dɥca wacũ ĩgu iicũ ĩagu “Iibiricãque,” arĩque ĩgure. Yujusubu, pesubu irire ĩgure mɥ iidorebirira pɥhrɥ ĩgu yɥhribiricũ ĩagu ĩgure wapicɥ duhucãque. <sup>11</sup> Eropa dɥayasogu ñeri dihtare ɥaribejaniguigu ãhrimi. Eropa ĩgu iicũ ĩarã ĩgu ñegu árĩcũ masi, ĩgure wapicɥbiricãro gahmea.

*Pablo doretupu*

<sup>12</sup> Nicopoligue puhirópẽ árĩbu iiaa. Eropigu Artemare o Tíquicore mɥ pohroque yɥ obeomɥhtacũ eroguerere yɥre bocatĩrigu árĩque mɥhɥ. <sup>13</sup> Eropigu dorerire õaro mehregure Zena waĩcugure, Apolo sãre õaro itamuque erã waborore. Eropigu erã gamerire árĩpehrerere oque erãre dɥhyaro mariro. <sup>14</sup> Eropirã Jesu yarã mari mera majarã õarire iipoporo. Gajinore opapehobirãre erã itamuboro dopa, õarire iiniguirã erã árĩboro dopa eropa iipoporo.

*Pablo õadorebeopu Jesu yarãre*

<sup>15</sup> Árĩpehrerã yɥ mera majarã mɥre õadorema. Ero árĩrã Jesu yarã gɥare mahirã õaporo. Árĩpehrerãre mɥare Goãmɥ ĩgu mahiri mera turarõ õadorea. Eropa ta árĩniguicãporo. Iripêta ãhraa.

**Goãmu Yare Wereripu**  
**Desano: Goãmu Yare Wereripu New Testament**  
copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

---

PDF generated using Haiola and XeLaTeX on 21 Feb 2024 from source  
files dated 29 Jan 2022  
17771afc-c309-57fd-9ff3-2d5a0cd59ff1